

Bil. 15

Selasa

12 Oktober 2021



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEEMPAT
MESYUARAT PERTAMA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Isu Banjir Taman Muhibbah Jaya Fasa 2, Sungai Siput (U)**
- *YB. Tuan Kesavan a/l Subramaniam (Sungai Siput)* (Halaman 1)
- **Status Tindakan Susulan Penyelesaian Isu Banjir di Kawasan Parlimen Kulai**
- *YB. Puan Teo Nie Ching (Kulai)* (Halaman 3)

**MALAYSIA
KAMAR KHAS
PARLIMEN KEEMPAT BELAS
PENGKAL KEEMPAT
MESYUARAT PERTAMA
Selasa, 12 Oktober 2021**

Mesyuarat dimulakan pada pukul 2.30 petang

DOA

[Timbalan Yang di-Pertua (Dato' Mohd Rashid Hasnon)
mempengerusikan Mesyuarat]

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

**Isu Banjir Taman Muhibbah Jaya Fasa 2, Sungai
Siput (U)**

2.34 ptg.

Tuan Kesavan a/l Subramaniam [Sungai Siput]: Terima kasih, Tuan Yang di-Pertua. Yang Berhormat Timbalan Menteri Alam Sekitar dan Air, isu banjir merupakan isu besar di kawasan Parlimen Sungai Siput khususnya di taman-taman sekitar Pekan Sungai Siput. Antaranya, Taman Lintang Makmur dan Taman Muhibbah Jaya, Fasa 2 yang sering menimpa kedukaan akibat banjir kilat.

Keadaan bentuk muka bumi, bukit-bukit, sistem pengaliran air dan kekerapan hujan lebat sering menyebabkan berlakunya banjir kilat hingga mengakibatkan kerugian yang besar kepada tuan punya rumah mencecah puluhan ribu ringgit setiap kali berlakunya bencana banjir. Pada tahun ini sahaja, lebih tujuh kali berlaku banjir kilat secara mengejut. Ketika hujan lebat, di mana air masuk ke dalam rumah hampir tiga kaki yang mengakibatkan kerosakan perabot, peralatan elektronik, kenderaan motor, kereta dan menjejaskan kesihatan keluarga mereka.

Pada tatkala rakyat berdepan dengan pandemik COVID-19, perintah kawalan, hilang punca pendapatan, warga di Taman Muhibbah Jaya, Fasa 2 ini ditambah pula dengan beban kerugian dan ancaman banjir yang boleh berlaku pada bila-bila masa. Kesemua penghuni di Taman Muhibbah Jaya, Fasa 2 ini sering meluahkan perasaan kebimbangan dan keselamatan keluarga. Mereka turut melahirkan rasa kecewa terhadap agensi-agensi kerajaan yang bertanggungjawab seperti majlis perbandaran dan JPS serta wakil-wakil setempat.

Untuk makluman Dewan yang mulia ini, isu banjir di Sungai Siput pernah dibangkitkan di Dewan Rakyat sejak tahun 2019. Jawapan kerajaan pada ketika itu, mengambil maklum isu ini dan akan mengambil langkah-langkah perlu bagi menyelesaikan masalah ini. Saya sebagai Ahli Parlimen amat prihatin dan rasa terpenggil membahaskan isu ini sekali lagi yang belum ada penyelesaian. Saya memohon Yang Berhormat Timbalan Menteri menyatakan status terkini perancangan yang sudah dan sedang dibuat bagi menyelesaikan masalah banjir secara menyeluruh.

Sekian, terima kasih.

2.36 ptg.

Timbalan Menteri Alam Sekitar dan Air [Dato' Mansor bin Othman]:

Assalamualaikum warahmatullahi wabarakatuh. Salam sejahtera. Terima kasih, Tuan Yang di-Pertua. Terima kasih, Yang Berhormat Sungai Siput di atas soalan ini.

Tuan Yang di-Pertua, untuk makluman Ahli Yang Berhormat Sungai Siput, isu banjir di Taman Lintang Makmur dan Taman Muhibbah Jaya Fasa 2, Sungai Siput (Utara) berpunca daripada beberapa faktor iaitu keadaan bentuk muka bumi yang berada di kawasan yang rendah yang menyebabkan kawasan tersebut mudah ditenggelami semasa berlakunya banjir kilat. Tambahan pula, apabila terjadinya hujan yang lebat berlaku serentak di kawasan hulu serta kawasan setempat melebihi dua jam. Selain itu, aras air Sungai Nyamuk yang tinggi tidak dapat menampung air larian seterusnya menyebabkan sistem perparitan dalam kawasan taman perumahan tersebut melimpah dan menyebabkan banjir kilat.

Menurut Akta Jalan, Parit dan Bangunan 1974 [Akta 133], tanggungjawab untuk membina dan menyenggara parit adalah di bawah Pihak Berkuasa Tempatan (PBT). Selain itu, keputusan Jemaah Menteri tahun 1996 telah menggariskan pembahagian tanggungjawab di antara Pihak Berkuasa Tempatan (PBT) dan juga JPS. Menurut keputusan Jemaah Menteri tersebut, semua sistem saliran dalaman iaitu sistem saliran buatan adalah di bawah tanggungjawab PBT manakala, sistem saliran asal semula jadi iaitu sungai dan anak sungai adalah di bawah JPS.

Walau bagaimanapun, KASA melalui JPS, telah mengambil inisiatif proaktif dalam membantu kerajaan negeri dan Pihak Berkuasa Tempatan (PBT) melaksanakan kerja-kerja membina dan menaik taraf sistem saliran dalaman. Bagi penyelesaian jangka pendek yang melibatkan peruntukan kerajaan negeri ia melibatkan kerja pemasangan pam bergerak di Taman Muhibbah Jaya, Fasa 2 bagi mengepam air berlebihan dari longkang perumahan ke Sungai Sintang dan kerja penyelenggaraan Sungai Nyamuk untuk memastikan kelancaran air.

Manakala, bagi penyelesaian jangka panjang, Kementerian Alam Sekitar dan Air (KASA) melalui Jabatan Pengairan dan Saliran (JPS) telah melaksanakan Projek Saliran Mesra Alam dan Kerja-kerja Berkaitan di Daerah Kuala Kangsar dengan kos projek berjumlah RM 20.5 juta. Projek ini dalam peringkat pelaksanaan dan dijangka siap pada bulan Ogos 2023. Kawasan Taman Lintang Makmur dan Taman Muhibbah Jaya, Fasa 2 juga termasuk dalam pelaksanaan Projek Saliran Mesra Alam ini.

Sekian, terima kasih Tuan Yang di-Pertua.

Status Tindakan Susulan Penyelesaian Isu Banjir di Kawasan Parlimen Kulai

2.40 ptg.

Puan Teo Nie Ching [Kulai]: Terima kasih, Tuan Yang di-Pertua. Kejadian banjir semakin kerap berlaku di kawasan Kulai sejak dua bulan ini. Sebanyak enam kali banjir yang serius telah berlaku dan membawa impak yang besar kepada penduduk di Kulai.

Antara kawasan dan butiran adalah seperti berikut;

Tarikh	Kawasan berlaku banjir
29 September 2021	Kampung Melayu Bukit Batu, Kampung Sungai Siam, Murni Jaya
18 September 2021	J104 Jalan Sengkang di depan kilang Lee Soon Seng, Kampung Baru Kelapa Sawit, Taman Palma Sawit, Taman Sawit Indah
16 September 2021	Taman Palma Sawit, Taman Sawit Indah
4 September 2021	Taman Aman, Kampung Jaya Sepakat, Taman Perindustrian Senai, Jalan Persekutuan (Kulai Besar)
2 September 2021	Taman Sri Muhibah
13 Ogos 2021	Jalan Persekutuan (Batu 21), Taman Sri Kulai Baru 2, Taman Sri Muhibah, Taman Selatan

Trend kekerapan berlakunya banjir amat membimbangkan penduduk Kulai. Kejadian ini bukan sahaja menyebabkan kerugian harta benda mereka malah merosakkan harta benda awam sehingga membahayakan keselamatan rakyat. Antaranya, banjir yang berlaku di Kampung Melayu Bukit Batu pada 29 September 2021 yang mengalami keadaan yang paling serius. Sebanyak 22 buah keluarga yang

melibatkan 74 orang penghuni terpaksa berpindah ke Pusat Pemindahan Banjir Sementara di dewan Sekolah Menengah Bukit Batu.

Selain itu, banjir yang berlaku di Jalan Persekutuan (Batu 21) pada 13 Ogos 2021 membawa kerugian yang besar kepada peniaga-peniaga kedai dan juga penduduk di kawasan kediaman sekitar. Kolam Tadahan Kawalan Air Banjir Batu 21 berlaku 'overflow' dan air melimpah dari kolam ke Jalan Persekutuan.

Soalan saya kepada Kementerian Alam Sekitar dan Air;

- (i) apakah punca utama dan status tindakan susulan penyelesaian isu banjir di kawasan Parlimen Kulai;
- (ii) berapakah peruntukan tahunan untuk kerja penyelenggaraan Kolam Kawalan Banjir Batu 21 sejak tahun 2017 hingga 2022; dan
- (iii) berapakah peruntukan tahunan yang disalurkan kepada Jabatan Pengaliran dan Saliran Daerah Kulai dalam kerja penyelenggaraan sungai sejak tahun 2017 hingga 2022.

Sekian, terima kasih.

2.43 ptg.

Timbalan Menteri Alam Sekitar dan Air [Dato' Mansor bin Othman]: Terima kasih Tuan Yang di-Pertua. Terima kasih Yang Berhormat Kulai. Untuk makluman Ahli Yang Berhormat, Kementerian Alam Sekitar dan Air (KASA) mengambil berat dan melahirkan rasa simpati akan masalah banjir yang berlaku di beberapa kawasan penempatan dalam Parlimen Kulai.

Kejadian banjir yang telah berlaku pada bulan Ogos dan September 2021 di daerah Kulai adalah disebabkan;

- (i) hujan lebat dalam tempoh satu hingga tiga jam yang mana rekod tertinggi hujan maksimum direkodkan oleh Stesen Hujan Taman Aman, Kulai pada 4 September 2021 dengan bacaan hujan 125mm bagi tempoh dua jam;
- (ii) ketidakcukupan sistem saliran sedia ada yang mana saliran di Jalan Persekutuan, kawasan perumahan, kolam takungan dan kampung sudah tidak dapat menampung kapasiti air hujan yang tinggi dalam tempoh satu masa;
- (iii) limpahan air dari sungai utama seperti Sungai Ulu Pontian Besar dan Sungai Sayong akibat daripada aliran air yang tidak lancar menyebabkan kawasan rendah berhampiran sungai utama dibanjiri; dan

- (iv) air laut pasang tinggi di muara Sungai Pontian Besar menyebabkan aliran air tidak dapat keluar terus ke laut dan memburukkan lagi keadaan banjir kilat di daerah ini.

Penyelesaian jangka pendek yang melibatkan kerja penyelenggaraan parit dan sungai adalah seperti berikut; Merujuk kepada kejadian banjir di Taman Aman, Kampung Jaya Sepakat, Taman Perindustrian Senai dan di Jalan Persekutuan (Kulai Besar). Pada 4 September 2021, dimaklumkan bahawa lawatan JPS bersama pihak PBT ke lokasi banjir telah diadakan pada 5 September 2021 dan sepakat untuk melaksanakan kerja penyelenggaraan mengikut bidang kuasa masing-masing iaitu PBT akan melaksanakan kerja penyelenggaraan di dalam kawasan taman perumahan, manakala JPS akan melaksanakan kerja penyelenggaraan daripada *outlet* keluar taman perumahan ke Sungai Skudai.

Sehubungan itu, JPS telah melaksanakan kerja-kerja menyelenggarakan sistem perparitan di Kawasan Taman Beringin serta kerja-kerja berkaitan di Mukim Senai, Kulai Johor dengan menggunakan peruntukan kerajaan negeri dengan kos berjumlah RM 19,950.00 dan telah siap pada 5 Oktober 2021.

Merujuk kepada kejadian banjir di Taman Palma Sawit, Taman Sawit Indah pada 16 September 2021. Kejadian banjir di J104 Jalan Sengkang di depan kilang Lee Soon Seng dan di Kampung Baru Kelapa Sawit, Taman Palma Sawit, Taman Sawit Indah pada 18 September 2021. Dimaklumkan bahawa lawatan JPS bersama pihak PBT ke lokasi banjir telah diadakan pada 19 September 2021 dan sepakat untuk melaksanakan kerja penyelenggaraan mengikut bidang kuasa masing-masing iaitu PBT akan melaksanakan kerja penyelenggaraan di dalam kawasan taman perumahan manakala JPS akan melaksanakan kerja penyelenggaraan daripada *outlet* keluar taman perumahan ke Sungai Pontian Besar.

Sehubungan itu, JPS akan melaksanakan kerja-kerja menggali dan membersihkan cabang anak sungai Pontian Besar serta lain-lain kerja di Taman Palma, Kelapa Sawit, Kulai, Johor dengan menggunakan peruntukan kerajaan negeri dengan kos berjumlah RM19,900.00 dan dijangka siap pada 1 November 2021.

Manakala, merujuk kepada kejadian banjir di Kampung Melayu Bukit Batu dan Kampung Sungai Siam, Murni Jaya pada 30 September 2021. Dimaklumkan bahawa kerja pembaikan dan penyelenggaraan sistem saliran taman perumahan yang dinyatakan adalah di bawah bidang kuasa PBT, manakala bagi saliran perumahan kampung pula adalah di bawah bidang kuasa Pejabat Daerah Kulai.

Untuk makluman Yang Berhormat Kulai, peruntukan bagi kerja penyelenggaraan kolam kawalan banjir di Batu 21 sejak tahun 2017 sehingga tahun 2021 adalah

sebanyak RM1.8 juta. Peruntukan ini melibatkan peruntukan Persekutuan, kerajaan negeri dan juga Parlimen Kulai. Kementerian melalui JPS juga telah memperuntukkan sebanyak RM3.9 juta untuk melaksanakan 50 projek pemuliharaan sungai untuk mengurangkan risiko banjir di kawasan Parlimen Kulai dari tahun 2017 sehingga kini seperti berikut;

Bil.	Tahun	Perbelanjaan (RM)	Jumlah Projek
1.	2017	1,154,271.60	8
2.	2018	804,440.00	12
3.	2019	485,630.00	5
4.	2020	1,248,578.00	19
5.	2021 (PEMERKASA)	300,000.00	6
Jumlah		3,992,919.60	50

Sekian, terima kasih.

Timbalan Yang di-Pertua [Dato' Mohd Rashid Hasnon]: Terima kasih, Yang Berhormat Timbalan Menteri. Ahli-ahli Yang Berhormat, Mesyuarat Kamar Khas ini ditangguhkan sehingga suatu tarikh yang tidak ditetapkan. Terima kasih, Ahli-ahli Yang Berhormat.

[Kamar Khas ditangguhkan pada pukul 2.49 petang]